



Die 20 Octobris
S. Cornelii, Centurionis.

Ant. ad introitum

I Tim. 2, 4

Deus omnes homines vult salvos fieri,
et ad agnitionem veritatis venire.

Collecta

Deus, qui Cornélio centurióni Angelum tuum misísti,
ut viam ei salutis osténderet,
da nobis quæsumus,
in salvatiónem ómnium libéntius operári,
ut una cum eis, in Ecclesiá tua, ad te pervenire possimus.
Per Dóminum.

LECTIO PRIOR (propr.)

«Et in nationes gratia Spiritus sancti effusa est»

Lectio Actuum Apostolorum 10, 25-27. 34-35. 44-48

Factum est, cum introísset Petrus, óbvius ei Cornélius
prócidens ad pedes adorávit. Petrus vero levávit eum dicens:
«Surge, et ego ipse homo sum».

Apériens autem Petrus os dixit: «In veritate compério
quóniam non est personarum accéptor Deus, sed in omni
gente qui timet eum et operátur iustitiam accéptus est illi.»

Adhuc loquente Petro, cecidit Spíritus Sanctus super

omnes qui audiébant verbum. Et obstupuérunt qui ex cir-
cumcisióne fidéles qui vénerant cum Petro, quia et in natiónes
grátia Spíritus Sancti effúsa est; audiébant enim illos loquén-
tes linguis et magnificántes Deum.

Tunc respóndit Petrus: «Numquid aquam quis prohibére
potest ut non baptizéntur hi qui Spíritum Sanctum accepé-
runt sicut et nos?» Et iussit eos in nómine Iesu Christi bap-
tizári. Tunc rogavérunt eum ut manéret áliquot diébus.

Verbum Dómini.

PSALMUS RESPONSORIUS

97, 1. 2-3ab. 3cb-4 (R. : cf 2b)

R̃. In conspéctu géntium revelávit Dóminus salutáre suum.

- 1 Cantáte Dómino cánticum novum,
quia mirabilia fecit.
Salvávit sibi dextera eius,
et bráchium sanctum eius. R̃.
- 2 Notum fecit Dóminus salutáre suum,
in conspéctu géntium revelávit iustítiam suam.
Recordátus est misericórdiæ suæ
et veritátis suæ dómui Israël. R̃.
- 3 Vidérunt omnes términi terræ
salutáre Dei nostri.
Iubiláte Deo, omnis terra.
erúmpite, exsultáte et psállite. R̃.

ALLELUIA

Rom. 10, 13

R̃. Alleluia Ṽ. Omnis quicúmque invocáverit Nomen Dómi-
ni, salvus erit. R̃. Allelúia.

EVANGELIUM

«Apud nullum inveni tantam fidem in Israël»

✠ Lectio sancti Evangélii secúndum Matthæum 8, 5-11

In illo témpore :

Cum introisset Iesus Caphárnaum accéssit ad eum centúrio rogans eum et dicens: «Dómine, puer meus iacet in domo paralyticus et male torquétur». Et ait illi: «Ego véniam, et curábo eum».

Et respóndens centúrio ait: «Dómine, non sum dignus ut intres sub tectum meum: sed tantum dic verbo, et sanábitur puer meus». Nam et ego homo sum sub potestáte, habens sub me milites, et dico huic: «Vade» et vadit, et alio: «Veni», et venit, et servo meo: «Fac hoc», et facit.»

Audiens autem Iesus, mirátus est, et sequéntibus se dixit: «Amen dico vobis; Apud nullum invéni tantam fidem in Israël. Dico autem vobis quod multi ab oriénte et occidénte vénient et recúmbent cum Abraham et Isaac et Iacob in Regno cælórum.»

Verbum Dómini.

Super oblata

Réspice, Dómine, in fáciem Christi tui,
quí pro ómnibus redemptionem trádidit semetípsum,
ut per eum ab ortu solis usque ad occásus
nomen tuum magnificétur in géntibus,
et una ubíque maiestáti tuæ exhibeátur oblátio.
Per Christum.

Ant ad communionem

Rom' 10, 12

Non enim est distinctio Iudæi et Græci; nam idem Dóminus ómnium; dives in omnes qui invocant illum.

Post communionem

Sacraménta quæ sumpsimus, Dómine Deus noster,
illam nobis fidem innútriant,
quam beáto Cornélio mirabiliter largíri dignátus es.
Per Christum.